

SENNACIULO

OFICIALA ORGANO DE SENNACIECA ASOCIO TUTMONDA

REDAKTEJO, ADMINISTREJO K SIDEJO DE PLENUM-KOMITATO : 67, avenue Gambetta, Paris 20°

Poŝtĉekaj kontoj je nomo de SAT-Paris : Bruxelles n-o 350 189, S'Gravenhage n-o 211 533, Kopenhago n-o 4 986, Paris n-o 1234 22, Stokholmo n-o 74 153, Wien n-o D-109 068, Zagreb n-o 41 448, Zürich n-o VIII-200 49. Alilande oni pagu per poŝtmandato je nomo de SAT bonvalutaj devizoj en rekom. letero aŭ bankĉeko je nomo de « Bannier ».

PRINCIPOJ DE UNUECO

Jam de kelka tempo oni diskutas en lab. esp-aj gazetoj pri kunigo de ĉiuj proletaj esp-istoj en unu solan organizon. Al tia demando certe rilatas simpatie ĉiu sincera K-do. Sekve, ni ĉiuj devas bone pripensi la aferon, cerbumi por trovi la plej facile ireblan vojon k tiucele difini la gvidprincipojn, kiuj donu la ĝustan orientadon k certigu eviton de erar-paŝoj.

Por pristudi tiun problemon, ĉu ni staru ĉe pure abstrakta pozicio? Aŭ ĉu ni prikonsideru la faktojn tiaj, kiaj ili estas, la realaĵon sub ĝia kruda aspekto? Ĉiu certe konsentos, ke la lasta vidpunkto estas la sole taŭga.

Larĝtrajte, unueco ekzistis pere de SAT ĝis la jaro 1930. Kial ĝi romp-iĝis? Ĉu la principoj metitaj en la Statuton de la Asocio estis ne ĝustaj, ne celkonformaj? Al tiuj demandoj mi respondos, paroligante faktojn. Ĉiu persono, kiu volos esplori sen-pasie k serioze la historion de nia movado, helpante sin per la dokumentoj, troveblaj en protokoloj de kongresoj aŭ aliaj presaĵoj, nepre alvenos al sama konkludo kiel la mia.

Sed antaŭ ol komenci tiun esploradon, mi opinias necese atentigi la legantojn, ke mi ne havas respondecon en la gvidado de SAT k sekve parolas nur en mia propra nomo. Eble la nuna Plenum-Komitato aliel prezentas al si la problemon... Mi ne havas alian celon, alian deziron ol helpi al Gek-doĵ prijuĝi mem la demandon.

I.

La unua principo, kiu direktis ĉe la fondo de SAT estis, ke necesas apartigi laŭklase la esperantan movadon; ke tia apartigo estas necesa en la intereso mem de l'tuta esp-a movado. En la tri eldonoj de « For la Neŭtralismon! » oni ja povas legi:

« Kiam esp-o sukcesas en burĝaj rondoj, mi kompreneble ĝojas. Konvinkita mi estas, ke universala lingvo

entenas econ revoluciigan. Samkiel celere ĉio scienca: Internaciismo estus ja nur revo, se ne ekzistus fervojoj, telegrafo, aviadiloj ktp. Vole nevole la scienculoj laboras por tutmonda revolucio... »

Al tio konsentis ĉiuj SAT-anoj. Neniam do temis ĝeni aŭ detrui la neŭtralan movadon. Tamen iu persono, kiu ĉe la fondo de SAT ne tuj aliĝis k dume preferis koketi kun neŭtraluloj, konigis siajn sekretajn pensojn en novembro 1929. Senbrida komandemo k regemo montriĝas en jena cito, ĉerpita el la n-ro I de « Kunligilo », konfidenca bulteno, kiun ricevis, en la tempo de l'preparo al la skismo, nur la anoj de la Komunista Frakcio, k kiu venis en miajn manojn per iu mistera vojo:

« Fakte por ni SAT estis ĝis nun valora de du vidpunktoj: 1) kiel movado frakasanta k iom post iom per si anstataŭanta la neŭtralan movadon esp-an k 2) kiel asocio prezentanta certajn eblojn doni informojn pri la lab. k la klasbatala movado al la SAT-anoj k per ilia helpo al la laboristoj-proletoj diverslandaj.

« La klasbatalaj esp-istoj k intelektaj fortoj per ili reprezentataj estas jam nun sufiĉe maturaj por povi ankaŭ memstare, sen interveno de politike senforma asocio simila al SAT, daŭrigi la laboron de la frakasado k anstataŭado de neŭtrala movado... »

Parolinte poste pri « fals-Marksista gvidado de SAT » k pri « fuŝa oportunisma filozofado », la konspiranto daŭrigas:

« Se tiu fuŝado oportunisma daŭros k se ni ne povos en la kadroj de SAT ĝin malhelpi, liam nature ni devos konstati, ke SAT perdas por ni ĉian valoron..., ke ĉiuj klaskonsciaj k klasbatalprelaj revolucianoj devas foriri el SAT k serĉi novajn vojojn por efektivigi sian revolucion agitpropagandan peresperantan laboron inter la laboristoj diverslandaj. »

Tiu ridinda pretendo k maldelikata ruzo estas anonime esprimitaj. Sed mi timas neniun dementon, asertante, ke ili estas de E. Drezen, kiu iniciatis k gvidis la tutan skisman entreprenon en nia movado.

Ni do notu bone en la memoron, ke jam en la jaro 1929 ekzistis sekreta organizo celanta: 1) Trudi al SAT taskojn, kiujn ĝi neniam havis antaŭe; 2) tiucele kapti ĝian gvidadon; 3) en okazo de malsukceso fari skismon. Se la spaco permesus, mi povus liveri pri tio multajn aliajn pruvojn, ĉerpitajn el la 9 n-roj de « Kunligilo », kiujn mi posedas k konservas por plene informi eventuale personojn, kiuj havas en tio intereson.

II.

La dua principo, kiu ĉiam havis la unuaniman aprobon en ĉiuj niaj kongresoj, estas eldirita en la gvidrezolucio, voĉdonita ĉe la fondkongreso de SAT en Praha:

« Konsiderante: a) ke la ĉefa tasko de nia Asocio povas neniel esti politika, ĉar jam ekzistas klasbatalaj organizoj; b) ke samkiel antaŭ 20 aŭ 30 jaroj estis nepre necese, ke ĉiuj praktikantoj de esp-o — ĉu pastroj, ĉu anarkistoj, ĉu policianoj — ariĝu por montri per faktoj, ke artefarita lingvo povas esti uzata en la praktiko, estas nun necese, ke ĉiuj esp-istoj, anoj de diversaj klasbatalaj organizoj, ariĝu en unu solan Asocion por montri al la proletaro, per imponaj faktoj, kiom utiliga estas esp-o por la batalo kontraŭ la kapitalisma sistemo. »

Kiaj estu tiuj « imponaj faktoj », kiuj konvinku la proletaron pri la utilego de esp-o? Ili povas esti nur jenaj: kongresoj, ampleksaj k ofte aperantaj gazetoj, abunda k valora literaturo, informaparato liveranta sciigojn al lab. nacilingvaj gazetoj, praktikaj servoj inter la esp-istoj.

Ĉion tion provis plenumi SAT k kelkrilate ĝi sukcesis: okazis ja ĉiujare impona kongreso k « S-ulo »

estis antaŭ la skismo 12-paĝa, semajna, k publikigis la materialon de informaparato en la rubriko : *Esperanta Servo*.

III.

La tria principo estas, ke por la prosperigo al nia movado, ĝi devas esti dufaka : 1) *poresp-a* (LEA-oj) ; 2) *peresp-a* (SAT) k ke mondlingvanoj *nenial* devas organiziĝi internacie, sed sennaciece.

Kiam oni vidas, ke la naciismo venke antaŭeniras ĉie en la mondo ; kiam oni ĉagrene konstatas, ke unu post la alia *naciaj* sekcioj de diversaj Internacioj fiaskas en sia laboro k malaperas antaŭ la faŝismo, ŝajnas al mi tute superflue argumentadi por montri la pravon de tiu lasta principo...

..

Tiuj tri principoj estas tute klare eldiritaj en la Statuto de SAT, kiu estis referendum akceptata de grandega plimulto. Tamen okazis skismo. Ĉu pro maltaŭgeco de la Statuto ? Ĉu pro malobeo al ĝi ? La faktoj parolu : Kiel ni vidis, nia Asocio ne havas politikajn taskojn k ĉiuj tendencoj povas esti en ĝi reprezentataj. Kontraste, en la Statuto de IPE ni trovas :

« ... b) *unuigas, organizas k gvidas ĉiujn proletajn esperanto-organizaĵojn k esperantistojn sur bazo de la revolucia klasbatalo, de la dialektika materialismo, de proleta internaciismo.* »

Kion signifas tio ? Tio signifas tute klare, ke anarkistoj, sindikatistoj, ISK-anoj k.a. kiuj ne riverencas senrezerve antaŭ la dialektika materialismo, ne povas havi lokon en IPE. Kaj en la gvidrezolucio, akceptita ĉe la fondkongreso de la skisma organizo, oni legas interalie jenon :

« 7. *IPE plej akre plu batalos kiel kontraŭ oportunisma sennaciismo, tiel ankaŭ kontraŭ la reformisma ideologio de la socialdemokratio, subtenantaj la imperialismajn rabadojn k militojn, kiuj plenumas la taskon deteni la laboristojn de klasbatalo k malhelpi la efektivigon de la ruĝa unueca fronto.* »

Nu, ankaŭ sennaciistoj k socialdemokratoj devas stari ekster IPE.

Sed iu povus argumenti jene : la grandega plimulto de la organizitaj laboristoj akceptas la dialektikan materialismon k pro tio nur ĝi povas konsistigi la larĝan konstruan bazon por nia movado. Feliĉe tia sofismo estas okulfrappe videbla. La sperto ja instruas, ke la anoj de tiu marksisma doktrino eĉ ne konsentas inter si pri ĝia apliko. Ekzistas diversaj skoloj, kiuj pretendas pli bone unuj ol la

aliaj kompreni k instrui tiun teorion. Sufiĉas menci la nomojn de Kaŭcki, de Stalin, de Trockij por ke oni tuj konsentu pri mia diro. Kaj lastatempe, la eksprezidanto de Komintern, Zinovjev, estis sendata en malliberejon por tie lerni dum 10 jaroj la ĝustan komprenon pri apliko de marksismaj principoj...

Ekrigardante super la historion de la lab. movado, oni ekvidas, ke en ĝi estis senĉesa displitiĝo, rekuniĝo, denove skismiĝo ktp. Sekve, se oni volas sincere k prudente difini la principojn, kiuj ebligis al ĉiuj lab. esp-istoj senescepte kuniĝi en saman organizon k tie daŭre kunlabori, la unua kondiĉo estas rifuzi kiel oficialan, *iun ajn apartan vidpunkton* de iu ajn el la nun ekzistantaj organizoj. Tial ke nia movado ne povas, k sekve ne devas, ludi politikan rolon, plenumi pure politikajn taskojn, estus ja tute malsaĝe trudi al ĝi iun ajn sociopolitikan programon.

Kiuj parolas pri unueco k pli malpli kaŝe pretendas trudi la vidpunkton de sia propra partio, tiuj ne parolas sincere, se ili estas inteligentaj. Se ili estas sinceraj, fanatiko blindigas ilin. Ambaŭkaze tiaj predikantoj pri unueco estas neniel atentindaj...

..

El tiu rapida ekzameno super la problemoj vidiĝas klare, ke la principoj, laŭ kiuj fondiĝis SAT, antaŭ 14 jaroj, estas la sole ĝustaj k ke la skismo, okazinta en nia movado, rezultas de tio, ke tiujn principojn forgesis, malatentis aŭ konscie malobeis parto el niaj Gek-doj. Pri la konscia malobeo, pri la decida intenco rompi nian unuecon, ni cetere trovas pruvon, cinike konfesitan, en la n-ro 44 de « Internaciisto », julio 1932 :

« *Kun ĉiu tago pli klariĝas la neblo, konservi iujn mezajn poziciojn inter la reakcia burĝaro k la batalanta por sia liberiĝo proleta. En tia situacio estiĝas tute komprenebla la fakto, ke ankaŭ la proleta esperantistaro rompas decidoplene ne nur kun la neŭtrala, fakte burĝa esperanta movado, sed ankaŭ kun la nebulecaj, fakte oportunistaj, malklasbatalaj ideoj de supernacia k supertendenca SAT.* »

« *Se tio ne okazus, la proleta esperantistaro ne meritis la nomon proleta k la tuta « proletesperantismo » devus esti konsiderata kiel tromplogilo por laboristoj, certacele utiligata de la burĝaro. LA SKISMO EN SAT, LA APARTIĜO DE LA REVOLUCIAJ ELEMENTOJ FOR DE LA ELEMENTOJ OPORTUNISTAJ K RENEGATREVIZIONISTAJ ESTIS NECESA K ANTAŬDIFINITA*

DEPER LA TUTA LOGIKO DE LA DISVOLVIGANTAJ SOCIAJ INTERBATALOJ. » (La substreko estas nia.)

La supra skisma deklaro estas subskribita *E. Drezen* k destinita al la unua kongreso de IPE. Kion li sekrete diris en la konfidenca « Kunligilo » du jarojn antaŭe, tion li malkaŝe konfesas, kiam la delonge preparita skismo estas efektivigita... Tiaj estas la *faktoj*, kiujn mi ne volas komenti, ĉar eble bonanimaj personoj dirus, ke mi parolas pasie.

— Nu, flustras al mi en la orelon, iu el tiuj naivaj, kredemaj homoj, kiuj nepre volas trovi pravigon al la plej fiaj k malsaĝaj faroj, vi mem faris skismon en la esp-a movado, kriante : « For la Neŭtralismon ! » ĉu do ne estas ĝuste opinii, ke 10 jarojn post la fondo de SAT venis ankaŭ la tempo por fari similan rompon en nia movado ?

Por montri la senvalorecon de tiu argumento, mi faros nur du rimarkigojn k kelkajn mallongajn citojn : 1) Hodiaŭ, kiel antaŭ 14 jaroj, mi havas la konvinkon, ke *laŭklasa* apartigo de la movado estas necesa, k sekve nun ne parolas pri rekunigo de la burĝa k proleta movadoj. 2) La sperto montris, ke SAT estas viv- k laborkapabla.

Kaj nun ni aŭskultu la konfesojn, faritajn ĉe la lasta kongreso — pardonu ! mi eraras, temas nur pri « konferenco » — de IPE. Kiel mi diris komence, nur la faktoj kvazaŭ parolu. Sed por ke ili estu tute klare kompreneblaj, necesas antaŭe memorigi, ke la skismigintoj celis frakasi la neŭtralan movadon k detrui SAT-on. Tiucele estis starigitaj IPE k ISLK (Internacia Sekretariaro de la Lingvokomisionoj) :

« *Ĉu hodiaŭ ni kapablas grandskale entrepreni la organizadon de kolektiva korespondado ? Certe ne ! La lingvonivelo de IPE-membraro estas hontinde malalta ; tiom, ke nur etan frakcion de la tuta anaro ni povas taksu tradukkapablaj.* »

« *En « Sur Posteno » estas pli da enigmoj ol troviĝas sur la dorsa paĝo.* » (Estas delikata maniero de la aŭtoro por diri, ke la IPE-gazeto estas fuŝredaktata.)

« *La fakto, ke ekzistas tia aferstato en la lingvo-kampo, per si mem pravas ke ISKL plene fiaskis en sia laboro.* »

« *Kelkaj montras kontraŭslaron al Plena Vortaro, dirante, ke ĝi havas multajn mankojn. Tion mi povas konsenti (Verŝajne la K-do parolas pri la unua eldono. E.L.), sed ni*